

## ■ CONVIVENZA

# Inscunter cun mamezza

DA FADRINA HOFMANN\*

**M**ia figlia ha survegnì in diari. Ella ha cumentà a scriver plain elan. Sin quai hai er jau prendì or da la trucca sin palantschin mes emprim diari per mussar tge che la Fadrina da dudesch onns aveva passentà avant in quart tschientaner. Da Nadal avev'jau survegnì il cuedeschet cotschen da tgirom cun marschlos e clavina per proteger bain bainin mintga secret. La clavina è ida a perder suenter tut quests onns, ma per fortuna era il marschlos anc avert ed uschia essan mia figlia ed jau ans tschentadas sin il canapé ed avain cumentà a leger.

**G**ia da mia scrittira era mia figlia impressiunada. Quella giada scrivev'jau anc cun ina penna eleganta e cun tinta. Ozendì na sa prest nadin pli leger mia scrittira. Malsogna professiunala. Schurnalists e medis han para las pli sgarschaivlas scrittiras. La Fadrina da dudesch onns percunter scriveva mintga frasa cun premura. Schizunt dissegns fascheva ella per illustrar las situaziuns. Il diari cuntagna bigliets da teaters e concerts, citats or da la gasetta e tatgaders. Igl è in vair archiv da mes temp d'adolescenza.

**J**au sun stutta da mes stil da scriver da quella giada. «Raquinta enavant l'i-



storgia», ha ditg mia figlia cura ch'jau hai vulì interrumer la lectura dal diari. Jau aveva propi scrit diari d'ina maniera uschè viva ch'ins sfundra sco lectur cumplettamain en la vita da questa matta. Quai era ina matta cun quitads e datetgs sco mintga matta da quella vegliadetgna: disputas cun ils fragliuns, discussiuns cun ils geniturs, matusaglias, secrets cun la meigra amia, examens en scola. Interessant è era ch'jau raquintava adina puspe tge che nus avevan guardà en la televisiun. I dat glistas da regals da Nadal, ma er ina glista dals uffants ch'eran stads malsaus quel enviern, passa la mesadad da la classa!

**L**as isanzas avev'jau de scrit cun tut las emozions colliadas cun quests gronds dis, per exemplu cun Chalandamarz. Jau aveva scrit da las lumparias dals mats en mia classa cun tant humor che mia figlia ed jau avain stuì rir dad aut cun leger ellus. Condoms sgulants en la gardaroba da

mattas, tststs... Remartgabels èn ils commentaris en parantesas en mes diari da l'onn 1994. Il diari scrivev'jau en sasez be per mamezza, ma en las parantesas commentav'jau mias atgnas observaziuns – e quai per part cun in'ironia incredibla per ina matta da la tschintgavla classa.

**C**un leger il diari da «Fadi» hai jau sviluppà simpatia per questa matta. Da guardar sin mamezza cun la distanza ch'jau hai oz è schont in pau curius. Jau ves differents tratgs caratteristics ch'en anc oz qua: l'amur per ils animals e la natira, la testardezza, il senn da responsabludad. Ma jau ves era chaussas ch'en idas a perder en quest quart tschientaner, la ferma cretta en la giustia, per exemplu. Cun leger il diari hai jau pensà pliras giadas: Ah chara, quai n'è tuttina betg uschè mal. Mintgatant era jau commovida da l'innocenza da questa matta. Gnanc en mes diari n'avev'jau ristgà da scriver il num dal mat, dal qual jau «crajeva» d'esser «in zic» inamurada. Donn ch'jau hai emblidà da tgi ch'i sa tractava.

**J**au scriv anc adina diari. Speranza hai jau en 25 onns era simpatia per la dunna ch'jau sun oz.

\* Fadrina Hofmann è redactura tar la «Südostschweiz» e viva cun sia famiglia a Scuol.